



Komunikadu Imprensa
Distritu Oekusi
03 Julu 2019

Komunidade Suku Bobocasse husu ba Governu atu halais aprovasun Lei Protesaun Labarik no halo sosializasaun ba lei sira ne'ebé ejiste

Komunidade sira iha suku Bobocasse, Sub-distritu Pante Makasar, Munisípiu Oekusi-RAEOA, husu ba Governu no Parlamentu Nasionál atu halais prosesu aprovasaun ba Lei Protesaun Labarik no halo sosializasaun ba lei sira ne'ebé ejiste ona. Kestaun ne'e, partisipante sira husu liuhosi treinamentu ne'ebé fasilita husi JSMP kona-ba materia Direitu Feto no Labarik no Asesu ba Justisa Formal, iha 28 Juñu 2019.

Komunidade no membru suku sira ne'ebé partisipa iha treinamentu ne'e hamutuk ema na'in 21 kompostu husi feto 10 no mane 11. Komunidade no membru suku sira ne'e mai husi aldeia Fatubisae no Bihala. Materia ne'ebé apresenta no diskute mak kona-ba definisaun labarik no direitu labarik, instituisaun sira nia obrigasaun atu proteje labarik, lei nasionál no instrumentu internasionál ne'ebé fó protesasaun ba direitu labarik, tipu krime sira hasoru labarik inklui artigu relevante sira iha Kódigu Penál ne'ebé fó protesasaun ba labarik.

“Treinamentu ne'e hanesan komitmentu ida husi JSMP hodi kontinua lori informasaun sira liu-liu iha relasaun ho direitu feto no labarik no mós prosidementu formal sira ne'ebé ejiste atu ajuda hasae sira koñesimentu kona-ba instrumentu legál no lei sira ne'ebé aseguira no fó protesasaun ba direitu feto no mós labarik inklui fó dalan oinsa atu bele halo prosesu tuir mekanismu sistema formal”, dehan Casimiro dos Santos, Diretór Interinu JSMP.

Durante treinamentu komunidade sira hatu'o sira nia pergunta, preokupasaun no lamentasaun sira kona-ba lei sira ne'ebé ejiste maibé laiha sosializasaun husi Governu no aprovasaun lei protesasaun labarik, prátika sira kona-ba direitu umanu ne'ebé hodi la respeita ema seluk, kestaun kona-ba divórsiu no responsabilidade ba oan sira nia futuro, violasaun seksuál ne'ebé envolve minóridade no violénsia doméstika (aman baku oan) ne'ebé sira konsidera hanesan mekanismu ida hodi eduka labarik. Aleinde ne'e, partisipante sira foti kestaun kona-ba hatudu filme *porno* ba labarik sira.

Hatan ba pergunta, preokupasaun no lamentasaun sira ne'e, iha relasaun ho kestaun sosializasaun ba lei sira no kestaun kona-ba Proposta Lei Protesaun ba Labarik ne'ebé to'o agora seidak deskute iha PN, JSMP esplika katak loos duni tuir loloos bainhira lei sira ne'ebé aprova no promulga, tuir loloos Governu liuhusi Ministériu Justisa iha knaar no obrigasaun hodi halo

sosializasaun ba lei sira ne'ebé ejiste ona, maibe dalaruma ita presiza kumpriende tanba ita nia Governu mós iha limitasaun rekursu no mós iha prioridade seluk, tanba ne'e mak iha lei balu to'o agora Governu seidauk halo sosializasaun. Entretantu kestaun kona-ba Proposta Lei Protesaun ba Labarik, JSMP esplika kona-ba envolvimentu JSMP nian iha prosesu diskuasaun kona-ba projeitu lei ne'e. JSMP informa ba comunidade sira kona-ba estatutu projeitu lei ne'e, ne'ebé Ministériu Solidaridade Sosiál no Inkluzaan iha planu ba preparasaun atu apresenta ba Konsellu Ministru hodi halo aprovasaun no apresenta ba Parlamentu Nasionál.

Relasiona ho kestaun direitu umanu no liberdade to'o la respeita ema seluk (la respeita inan-aman), JSMP esplika katak maske ita iha direitu no iha liberdade maibé iha mós limitasaun, singnifika katak ita bele iha liberdade no direitu atu halo buat ruma, maibé ne'e la-signifika atu uza direitu ne'ebé ita iha hodi viola fali ema seluk nia direitu. Nune'e mós dalaruma ita uza liberdade no direitu la-tuir nia dalan loloos ka laiha limite hodi prejudika ema seluk nia direitu atu goja.

Kestaun kona-ba divórsiu no abandona labarik, JSMP klarifka katak divórsiu nu'udar kazu sivíl nune'e sei rezolve tuir dalan sivíl. Kona-ba abandona labarik (kestaun alimentasaun), JSMP esplika katak iha fase primeiru bele liuhusi prosesu sivíl hodi husu ba aman ka inan ne'ebé abandona hela sira nia oan, hodi bele responsabiliza alimentasaun. Maibé kuandu depois tribunál hatun desizaun mak aman ka inan refere la-halo tuir desizasun tribunál nian, konsidera sira kontra artigu 225 Kódigu Penál kona-ba krime la halo tuir obrigasaun alimentár ho moldura penál ki'ik liu mak loron 30 prizaun no boot liu tinan 3 prizaun ka selu multa ba Estadu. Nune'e mos artigu 1758 Kódigu Sivíl Kona-ba ezersísiu póder paternal.

Aleinde ne'e, kestaun kona-ba baku oan ne'ebé konsidera hanesan meus ida atu eduka oan, JSMP esplika katak tuir Konstituisaun, labarik sira iha direitu atu hetan protesaan espesiál husi inan aman, sosiedade no Estadu liuliu hasoru hahalok sira hanesan la tau matan, abandona, violénsia no aktu sira seluk. JSMP mós esplika katak bainhira inan no aman komete krime hasoru oan sira (hanesan baku), kontra artigu 145 KP kona-ba ofensa ba integridade fízika simples. Tanba akontese iha doméstika ka iha relasaun familiar nian nune'e, konjuga ho Lei Kontra Violénsia Doméstika.

Iha relasaun kestaun kona-ba hatudu filme *porno* ba labarik sira, JSMP sita artigu 176 KP kona-ba pornografia infantile, no sei hetan pena entre tinan 3 to'o tinan 10.

Iha abertura no enseramentu ba treinamentu ne'e, Xefi Suku Bobocasse, Sr. Sebastião Cob husu ba partisipante sira atu fó prioridade no akompañia atividade ne'e ho sériu nune'e bele hetan informasaun útil tantu comunidade, inan-man nune'e mós autóridade lokal. Xefe suku ne'e hatutan katak, informasaun sira ne'ebé JSMP fahe ne'e útil tanba iha relasaun ho ita ho ita nia oan rasik sira nia direitu, nune'e ema hotu bele hatene katak dezenvolvimentu labarik sira nia moris ne'e iha ita-inan aman no comunidade nia responsabilidade. Xefe suku ne'e mos husu ba nia membru no comunidade sira atu kontinua habelar informasaun sira ne'e ba comunidade sira seluk ne'ebé la konsege hola parte iha atividade ne'e.

Ikus xefe suku ne'e lori comunidade suku Bobocasse agradese ba JSMP tanba ho iniciativa atu bele fahe informasaun importante ne'e ba sira nia comunidade.

Programa ne'e realiza ho apoiu finanseiru hosi Hivos.

Atu hetan informasaun liutan favor kontaktu direktamente:

Casimiro dos Santos

Diretór Interinu JSMP

E-mail: santos.cas76@gmail.com

Website : <http://www.jsmp.tl/>